



IRSYAD

Soalan

Adakah sah solat yang dibacakan Qunut Nazilah dengan dimasukkan dalam doanya perkataan Palestin, Iraq, Syria, Afghanistan, Burma dan lain-lain?

Jawapan

Qunut Nazilah ialah merujuk kepada doa yang dibaca dalam solat pada tempat yang khusus sewaktu berdiri. Ia merupakan satu daripada tiga dari jenis qunut yang sunat dibaca mengikut Mazhab Syafii selain qunut dalam solat subuh dan qunut dalam solat sunat witir yang bermula pada malam 16 Ramadan.

Qunut Nazilah sunat dibacakan ketika umat Islam ditimpa **bencana** atau **musibah** seperti peperangan, wabak, kemarau dan sebagainya. Baginda *Sallallahu alaihi wasallam* pernah membaca doa qunut nazilah ketika berlakunya suatu pengkhianatan dan pembunuhan ke atas beberapa sahabat Nabi *Sallallahu alaihi wasallam*. Diriwayatkan daripada Anas ibnu Malik *Radiallahu anhu*:

أَنَّ رِعْلًا وَذَكْوَانَ وَعُصَيْبَةَ وَبَنِي لَحْيَانَ اسْتَمَدُّوا رَسُولَ اللَّهِ صَلَّى اللَّهُ عَلَيْهِ وَسَلَّمَ عَلَى عَدُوِّ فَأَمَدَّهُمْ بِسَبْعِينَ مِنَ الْأَنْصَارِ كُنَّا نَسْمِيهِمُ الْقُرَاءَ فِي زَمَانِهِمْ كَانُوا يَحْتَطِبُونَ بِالنَّهَارِ وَيُصَلُّونَ بِاللَّيْلِ حَتَّى كَانُوا بَيْنَ مَعُونَةٍ قَتَلُوهُمْ وَعَدَرُوا بِهِمْ فَلَبَّغَ النَّبِيُّ صَلَّى اللَّهُ عَلَيْهِ وَسَلَّمَ شَهْرًا يَدْعُو فِي الصُّبْحِ عَلَى أَحْيَاءٍ مِنْ أَحْيَاءِ الْعَرَبِ عَلَى رِعْلٍ وَذَكْوَانَ وَعُصَيْبَةَ وَبَنِي لَحْيَانَ

Maksud: "Bahawa Bani Ri'lin, Zakwan, Usaiyah dan Bani Lahyan pernah meminta pertolongan dari Rasulullah *Sallallahu alaihi wasallam* untuk menghadapi musuh mereka. Maka baginda menghantar bantuan seramai 70 orang sahabat dari golongan Ansar. Kami menamakan mereka sebagai al-Qurra', mereka dahulunya mengedarkan makanan untuk orang-orang yang memerlukan pada siang hari dan banyak menunaikan solat pada malam hari. Sehingga mereka sampai di Bi'ri Ma'unah, tiba-tiba mereka dibunuh dan dikhianati oleh kabilah-kabilah berkenaan. Apabila berita itu sampai kepada Nabi *Sallallahu alaihi wasallam*, baginda membaca qunut (Nazilah) selama sebulan dan berdoa dalam solat Subuh agar ditimpakan balasan ke atas jenayah dan pengkhianatan Bani Ri'lin, Zakwan, 'Usayyah dan Bani Lahyan."

(Hadis Riwayat al-Bukhari, 4090)

JABATAN MUFTI SARAWAK

Berdasarkan hadis tersebut, Rasulullah *Sallallahu alaihi wasallam* memohon agar dikenakan balasan ke atas jenayah dan pengkhianatan Bani Ri'lin, Zakwan, 'Usayyah dan Bani Lahyan dalam qunut nazilahnya. Maka tidaklah menjadi kesalahan menyebut nama-nama negara yang didoakan dalam qunut nazilah dan sah solat yang dilakukan.